

PRIMA SESSIONE URDINARIA DI U 2019

1ère session ordinaire de 2019

28 è 29 di Marzu

28 et 29 mars

2019/O1/021

Question déposée par Anne Tomasi au nom du groupe Partitu di a Nazione Corsa (PNC)

Objet : e problematiche di l'insignamentu in u mondu paisanu

O sgiò Presidente di u Cunsigliu Esecutivu,
Madama a cunsigliera esecutiva in carica di l'insignamentu,

Un mese fà, st'assemblea hà vutatu una muzione cuncernendu e dutazione urarie, in risposta à u prublema ch'elli scuntravanu i picculi cullegi di u rurale : quist'annu Vicu è Cervioni, l'anni passati Moltifau, Livia, ... è forse quist'annu chì vene Petretu o Luri. Sta muzione ùn era micca a prima, è ancu s'ella hè un peccatu di pensalla, ùn pensu micca ch'ella serà l'ultima. Era soprattutto una risposta diretta è spuntanea à un prublema urgente. Ma a problematica di l'insignamentu in u rurale hè bella più larga chì quella scuntrata in sti cullegi...

A sapemu, u nostru internu s'hè spachjatu, è calanu dunque l'effettivi di e nostre scole. In u primariu, si sò chjose e piccule scole, è zitelli sò obligati à fà a strada per truvà una scola aperta. Quand'ella si sà ch'ella hà da diventà ubligatoria a scola per i chjuchi, ci pò ghjunghje u penseru à l'idea di fà fà à un zitellu di trè anni sin'à un ora à ghjornu di vittura per esse scularizatu.

In i cullegi, si perdenu l'ore, cù e cunsequenze chè no cunniscimu à nantu à u pedagogicu (pruggetti sacrificati, classe bilingue chjose, messa in cuncurrenza di e discipline, ...). E difficoltà di trasportu facenu chì un sculare di 2ndu gradu s'arriza à spessu à 6 ore di mane per esse à u cullegiu o à u liceu à 8 ore, è volta in casa à 6 ore di sera, o ancu 7, troppu stancu per fà i so duveri in cundizione bone.

In u rurale, hè più difficiule di fà scopre a cultura o a storia : i musei, i teatri, i sinemà sò per a maiò parte in cità, è dunque più luntanu di i stabbilimenti rurali. Hè più difficiule d'insignà u sportu : e strutture spurtive sò à spessu menu numerose (per esempiu e piscine).

Hè dinò più difficiule di truvà rimpiazzanti, o intervenanti, o assistanti stragneri per fà scopre e lingue, ... Per compie, l'urientazione sculare si face di più in funzione di e furmazione dispunibbule vicinu chè di e brame di u zitellu, o di u so avvene.

A salvezza di i nostri paesi di l'internu ùn si pò passà d'una riflissione glubbale à nantu à l'insignamentu in u rurale. Sta riflissione deve assucià tutti l'attori di l'educazione : l'Educazione Naziunale, i prufessori, i capistabilimenti, i sculari, i so parenti, i centri di furmazione prufeziunale, l'Università, e cumune, ... è bella sicura sta Cullettività.

A nostra quistione oghje hè dunque : chì pensate di a pussibilità è l'utilità d'organizà « Scontri di l'educazione in u rurale », per purtà sta riflissione tutti insieme è pruvà à sbuccà à nantu à misure forte chì cambieranu in prufundezza u mudellu ?